

國粹叢書第三集

野史八
種之一

蘇城紀變

國學保存會印行



3 0471 4677 8

蘇城記變

甲申孟夏傳聞燕都失守衆口沸騰云流賊將爲渡江之謀一時晉吳富室宦家多挈其子女玉帛避匿村落有不幸而遭綠林之暴者余是時妻妾俱喪孑然一身僑居金閭以寇盜付之度外生死聽之彼蒼耳既聞吳總兵三桂引北兵驅除流賊福王嗣位金陵荒於酒色北都乘江左主相淫昏率兵南下取皖城破廣陵渡長江襲潤川勢如破竹乙酉四月之杪吳中惶惶有兵下之憂矣時守土諸臣不思礪兵修雉爲天子保封疆惟知臨難而逃林下諸公不思散財募士借有司固吾圉但知束裝而遁延及端午後六日競傳北兵必至漏下三鼓逃竄者紛紛余時已續絃於葑門外之曹氏平旦束髮往觀行至安利橋但見城中男女老幼爭門而出哭聲震天履烏徧地孩赤委諸清流老羸斃於踐踏即一葑門如是而他門可知矣是日鄰里親戚各自逃生余囊如洗與老荆束手待斃甚以舟泊河下而嚴以却者晨炊後

927732

人心漸安避匿者亦漸停止傳聞北兵徑從丹陽取建康徐定四郡抵暮有
閩兵四人投宿靈官廟乞食云初八日與北兵交鋒江上敗走失伍至此是
時舊撫張鳳翽已去新任霍達方至一籌莫展日惟坐臥舫齋以便遁走十
四日晚驟雨方霽忽街中一酒徒大呼逃兵在胥門城外作亂放火行劫將
及此地愚民不察真僞復震驚狂走此語直沸至婁關人多逃避越宿無警
乃狼狽而歸人心惶怯如此十五日喧傳北兵唾手下留都辱主已傲孫皓
故事吾吳賴有錢牧齋在內力主招安可保無虞一時士民相慶十九日孝
廉楊惟斗與吳江孝廉潘爾彪荐一浙人李涵春於郡守陳卿泰謂其習天
文諳韜畧欲推爲主謀起義兵百姓恐蹈維揚覆轍相與鼓譟擊毀潘氏廬
將毆死浙人本府急出示解兵以慰之乃止時海內無主人得自恣霍撫借
犒軍之名多取公帑以肥私橐郡守聽狡吏之誑濫發倉廩以潤衙蠹而防
守重事絕口不談二十日徧貼黃紙於街市云南都已立定王及至二十四

日忽鴻臚少卿黃家鼐署通判周子靜皆吳產而率先歸順新朝者持北來詔令安撫吾蘇諸人揚揚張蓋策騎直入郡城上而都憲下至縣尹皆歛迹避去二十八日忽有楊監軍文驄者停舟接渡橋下二十九日清晨令都司朱國臣擒黃安撫并其黨四人戮之周通判遁免文驄色厲內荏偵知北兵且至遂於六月三日昧爽爲鼠竄之舉矣文驄一去人心益惶悚無措初四日十室九空先是比隣猶有四婦與老荆爲伍是日已閔無一人余夫婦閉門俟命而已日將午聞馬蹄蹀躞自北而南從門隙窺之狀貌猙獰衣裝怪異大約每隊四五十騎幸其志在追楊朱輩未遑肆暴也數隊已過後一隊行至敝廬前忽扶掖不進余手足無措向聞北兵最惡門扇所粘武士民間磨洗已盡獨余家及一隣家猶在以爲或觸其怒將斬關以入也頃之竟揚鞭以去雖免于禍然驚魂奪魂矣嗣後復過十餘隊遂爾寂寂日已向暮人情甫定又遙見燭回祿之虛復懷畏懼未幾炤息乃北兵追楊監軍至寶帶

橋文驄已不知所之舉火焚其所遺之舟耳寢未安席雞聲唱曉晨興携老
荆至後村一厄菴避之已有女郎數輩先在喘息稍定喧傳北兵三五爲羣
分道掠奪某巨室搶劫如洗矣某家姑媳悉被淫污矣某家少婦赴水身殞
矣忽村人又報兵在咫尺驚惶之際三人迨門見韋馱像儼然相顧不敢入
午後所傳更不忍聞凡值婦女無論衢巷田野即裸而狎之且環而鬪之多
頃刻致斃者雖鎮撫郡守示禁若罔聞也北柵陳醫生家妯娌二人尙少艾
有二十餘人自後戶入迫其煖酒治饌恣意飲啖淫樂余偕一友往觀見沿
門陳列杯盤郡卒環坐二女止下穿短棍雜於其中或與接唇或弄其乳或
以酒與之作合巹狀相與撫掌掀髯人共四圍攢睨莫敢誰何彼亦畧無顧
忌良可駭嘆回經一曲徑見二女屍紗衣碎裂渾身血污詢乃一母一女被
獲淫死者目睹心傷其他得於傳聞者難以枚舉眞斯民一大厄劫也是日
主帥駐兵在社壇云有屠城之意賴周子靜力解之而止夜來余獨居守舍

聞蟲鼠音聲亦夢中驚惕若人排闥直入又將加頸者初六日徧拘船隻下鄉剽掠晚從河干遙望輜重佳麗滿載而歸楊賊無功於國而貽禍吳民至此初八日北兵往取武林留蘇者淫掠如故百姓具呈於土王二公乃曰城以外非吾事也初十日余從尼菴到家偵伺有三人頓足田畔止余曰有兵丁拘人行舟慎毋往轉盼間兵已突至三人驚走余素艱步履自分必被拘執兵乃對余搖手直前搏一人而去不知何意也十二日稍寧靜向城內外探望親故有掩扉無覓者有安居無恙者是日有一刑部侍郎李延齡莅任李公雄踞都察院孝廉青衿求官者如市五經掃地矣最後借族兄登明至社壇觀貝勒大營及駱駝等異物傍晚言旋老荆寄居靜室方喜邀天之庇而兵丁又牧馬近地恐其騷擾十五日諸女伴各覓舟散去余無奈何見夕挈老荆仍返故廬終不遑寧處乃於二十日向主東覓一野航同載至館以避其虐往鄉之後日俟平靜以圖歸計而閏六月十日有薙髮之舉十三日


有陳湖之變力綿算拙畫虎不成反至黎元被屠婦女遭掠室廬成燼繁麗
吳城罹此慘毒痛哉余館在鄉僻自謂不減桃源乃風鶴之驚無日無之二
十一日村中互報兵已近爭匿小艇遠遁二十六日與七月四日望日皆然
至二十五日忽土兵數百統七巨艦罄劫主家余亦遭池魚之殃初五日又
金姓一人戎服同十餘人手持王某硃票索糧十石并擄一船而去能免於
外兵而不能免於土賊殆亦數不可逃也至八月二日里胥促人薙髮否則
有株連之禍一時盡髡其首初五日又沸傳將洗蕩陳湖凡三十里勦滅無
遺村人復相率爲五湖之游主人妻孥僅附隣舟以去余計無復之與村中
無舟者數家束手待斃真度刻如年也至初八日浮言始息避去者仍各返
棹始有更生之幸然胆亦爲之破矣吁余仕籍未登無能矢睢陽之節情我
管城聊書聞見云耳乙酉律中南呂下浣

續記

余前錄方竣適主人自城中歸鄉向余言新督鎮吳勝兆大行德政追緝兵卒所掠婦女存貯西察院內多衣冠宅眷吳公坐於院門婦女魚貫而進逐一叩其姓氏及男子姓名居址登記於冊着一標下官主之日給二餐以俟其家訪覓奈人衆難以徧及仍多受餒者人自外遙望婦女多從柵內窺伺皆蓬垢科跣衣不蔽體涕泗橫流或向外呼其親戚之名以得認去爲幸其幸而相值有親屬具姓名籍貫呈於主者驗冊果否合乃縱之歸大約主者公服上坐從卒持刃挾矢排立男婦囚首下跪縣尉青袍角帶趨踰其間宛如釋氏所繪十王圖吳中所創見者余自前月二十日下鄉足迹不入城市者久矣至重九後北兵無殺人意遂呼扁舟行近黃石橋橋基悉被拆毀一路民居十燬四五至安利橋市廛俱燼及抵故居已作瓦礫場矣正無聊閒恰值姻婭袁君悲喜相并把臂造其室共訴苦衷竊幸今夕有居停主也初進葑關城外靡有廬舍存者進城至詹橋一帶則完燬相半西行直達金閶

見長洲縣署及府署止燬其外郭吳縣署如故所經居民盡無恙此地何幸而獨安全然行人稀少市井蕭條大非曩時景象矣至專諸巷覓從兄居兵戈變故後見之欣喜欲狂詢知西城賴周子靜力爲緩頰又有長安三勇士在城上率其屬登城外數人上臺信其果非叛黨一方得以保全兄又床頭金盡姑應執爿守陴之役取升斗作糊口計苟延至此但細君驚憂成疾貧士醫禱無資大可虞也閭門月城內俱遭烈焰較葑門尤甚南濠上下兩岸自吊橋至康履橋不存一瓦一椽目睹爲之心惻康履橋而南若有默佑者祝融爲之歛威又從弟姪仍理故業是夕連擾兩君遂下陳蕃之榻詰朝訪舊留酌言按臺奉上旨令士民悉易滿洲冠服十三日知表弟葉紫瞻於閏月十八日投纆伊家母妻子弟並無音耗幾及九旬猶作梁上君余從窓隙窺之見僵屍宛然心甚不忍乃出青蚨四百文隣人復歛錢四百倩工瘞之十四日往郊外行及周夏二公祠前巨浸汪洋堤爲之沒足不能前因返至

從弟肆則兵丁差往武陵者戎裝五六人立於門首繫馬門外穢溺滿前幾於阻絕行人肆中爲之治膳爲之取芻若驛舍供待然同業十餘輩俱被侵擾晨興爲九月之望余具香燭詣三乘菴稽首諸神聖像前以酌覆庇之恩浼老衲求三元籤末云青雲有路終湏到莫把浮生作等閒則微軀似未遽填溝壑者午飯後向弟姪取阿堵一二千文爲束裝歸館計十六日乏便舟下鄉兀坐竟日十七日有村中王姓者載薪求售其小艇可附順風一棹仍履青毡地矣



光緒三十二年九月十二日首版
光緒三十二年九月十二日發行

(國粹叢書蘇城記變)

定價洋五分

印行者

上海鐵馬路北愛而近路
國學保存會

發行人

沈木厂

發行所

上海四馬路東惠福甫
國粹學報館

26. 306
51